

《續修四庫全書》編纂委員會編

續修四庫全書

上海古籍出版社

六七四·史部·地理類

〔道光〕廣東通志三百三十四卷首一卷（卷二百三十二至卷二百八十三）〔清〕阮元修

陳昌齊等纂

17/04

廣東通志卷二百三十二

宦績錄二 晉 南朝宋

吾彥	諸葛京
王毅	王諒
葛洪	郭訥
陶侃	鄧嶽
溫放之	謝奉
羅友	孔汪
吳隱之	儲叔度
張茂度	杜瑗
劉謙之	王鎮之
王誕 俱州官	張鎮
尹虞	楊方
鄧騫	袁宏
胡藩 俱郡官	陸徵
劉勔	宗慤
王琨	羊希
陳伯紹	陳顯達
孫曇瓘	謝昌寓 俱州官
徐豁	檀和之
鄧琬	沈法系
陸法真	孫奉伯

伏曼容俱郡官

庾道愍府佐以

晉

吾彥字士則吳郡吳人也仕吳吳亡彥始歸降交州刺史陶璜卒以彥爲南中都督交州刺史初陶璜之死也九真戍兵作亂逐其太守九真賊帥趙祉圍郡城彥悉討平之在鎮二十餘年威恩宣著南州寧靖自表求代徵爲太長秋卒於官晉書本傳

諸葛京字行宗蜀書注引瑯邪陽都人也咸熙元年內移河東蜀書諸葛氏傳泰始詔曰諸葛亮在蜀盡其心力其子瞻臨難而死義天下之善一也其孫京隨才署吏後爲郡令尚書僕射山濤啟事曰郡令諸葛京祖父亮遇漢亂分隔父子在蜀雖不達天命要爲盡心所事京治郡自復有稱臣以爲宜補東宮舍人以明事人之理副梁益之論京位至廣州刺史蜀書諸葛氏傳推誠待物有祖風烈吏民稱之黃志

王毅長沙人少以學行被州郡辟仕至蒼梧太守黃志勝修討郭馬未克聞吳亡縞素流涕還與毅各送印綬請降帝皆復其本職通鑑後爲廣州刺史甚得南越之情晉書王以家國爲憂永興二年卒于廣州黃志

王諒字幼成丹陽人也少有幹畧爲王敦所擢參

其府事稍遷武昌太守初新昌太守梁碩專威交
士迎立陶咸爲刺史咸卒王敦以王機爲刺史碩
發兵距機自領交趾太守乃迎前刺史修則子湛
行州事永興三年敦以諒爲交州刺史諒將之任
敦謂曰修湛梁碩皆國賊也卿至便收斬之諒卽
到境湛退還九真廣州刺史陶侃遣人誘湛來詣
諒所諒勅從人不得入問旣前執之碩時在坐曰
湛故州將之子有罪可遣不足殺也諒曰是君義
故無豫我事卽斬之碩怒而出諒陰謀誅碩使客
刺之弗剋遂率衆圍諒於龍編陶侃遣軍救之未
至而諒敗碩逼諒奪其節諒固執不與遂斷諒右
臂諒正色曰死且不畏斷臂何有十餘日悲憤而
卒碩據交州凶暴酷虐一境患之竟爲侃軍所滅
傳首京師晉書忠義傳

葛洪字稚川丹陽句容人也少好學家貧躬自伐
薪以貿紙筆夜輒寫書誦習遂以儒學知名太安
中石冰作亂吳興太守顧祕爲義軍都督與周玘
等起兵討之祕檄洪爲將兵都尉攻冰別卒破之
遷伏波將軍冰平洪不論功賞洪見天下已亂欲
避地南土乃參廣州刺史稽含軍事及含遇害遂
停南土多年征鎮檄命一無所就後還鄉里禮辟
皆不赴咸和初干寶薦洪才堪國史還爲散騎常

侍領大著作洪固辭不就以年老欲煉丹以祈遐
壽聞交趾出丹求爲勾漏令帝從之至廣州刺史
鄧嶽畱不聽去洪乃止羅浮山煉丹嶽表補東官
太守又辭不就乃以洪兄子望爲記室參軍晉書
郭訥武昌人廣州刺史晉書郭杜弢在湘中賊衆
共推弢爲主弢自稱梁益二州牧平難將軍湘州
刺史攻破郡縣刺史荀眺委城走廣州訥遣始興
太守嚴佐率衆攻弢弢逆擊破之荊州刺史王澄
復遣王機擊弢敗于巴陵晉書杜弢傳機就王敦求廣
州敦不許會廣州人背訥迎機爲刺史機遂將奴
客門生千餘人入廣州州部將溫邵率衆迎機敦
遣將軍葛幽追之及於廬陵機叱幽曰何以敢來
欲取死耶幽不敢逼而歸敦訥聞邵之納機也乃
遣兵擊邵反爲所破訥又遣機父兄時吏距之咸
倒戈迎機訥衆皆散乃握節而避機機遂入城就
訥求節訥歎曰昔蘇武不失其節前史以爲美談
此節天朝所假義不相與自可遣兵來取之機慚
而止晉書王機傳

陶侃字士行本鄱陽人也吳平徙家廬江之尋陽
以軍功封東鄉侯王敦表拜侃爲使持節寧遠將
軍南蠻校尉荊州刺史擊杜弢大破之進剋長沙
獲其將毛寶高寶梁堪而還王敦深忌侃功將還

江陵詣敦別敦畱侃不遣左轉廣州刺史平越中
郎將以王廙爲荊州侃之佐吏將士詣敦請畱侃
敦怒不許侃將鄭攀蘇溫馬儁等不欲南行遂西
迎杜曾以距廙敦意攀承侃風旨被甲持矛將殺
侃出而復還者數四侃正色曰使君之雄斷當裁
天下何此不決乎因起如廁諮議參軍梅陶長史
陳頒言于敦曰周訪與侃姻親如左右手安有斷
人左手而右手不應者乎敦意遂解於是設盛饌
以餞之侃便夜發敦引其子瞻爲參軍侃旣達豫
章見周訪流涕曰非卿外援我殆不免侃因進至
始興先是廣州人背刺史郭訥迎長沙人王機爲
刺史機復遣使詣王敦乞爲交州敦從之而機未
發會杜宏據臨賀因機乞降勸宏取廣州宏遂與
溫邵及交州秀才劉沆俱謀反或勸侃且往始興
觀察形勢侃不聽直至廣州宏遣使僞降侃知其
詐先於封口起發石車俄而宏率輕兵至知侃有
備乃退侃追擊破之執劉沆於小桂又遣部將許
高討機斬之傳首京師諸將皆請乘勝擊溫邵侃
笑曰吾威名已著何事遣兵但一函紙自足耳於
是下書諭之邵懼而走追獲於始興以功封柴桑
侯食邑四千戶侃在州無事輒朝運百甓於齋外
暮運於齋內人問其故答曰吾方致力中原過爾

優逸恐不堪事其勵志勤力皆此類也太興初進
號平南將軍尋加都督交州軍事及王敦得志上
侃復本職加散騎常侍時交州刺史王諒爲賊梁
碩所陷侃遣將高寶進擊平之以侃領交州刺史
錄前後功封次子夏爲都亭侯進號征南大將軍
開府儀同三司暨蘇峻作逆侃督護竟陵太守李
陽部將彭世斬峻於陣賊衆大潰侃旋江陵尋以
爲侍中太尉加羽葆鼓吹改封長沙郡公邑三千
戶賜絹八千匹加都督交廣寧七州軍事咸和七
年六月疾篤上表遜位薨於樊谿時年七十六

本傳

鄧嶽字伯山陳郡人也少有將帥才畧爲王敦參
軍轉從事中郎西陽太守郭默之殺劉允也大司
馬陶侃使嶽率西陽之衆討之默平遷督交廣二
州軍事建武將軍領平越中郎將廣州刺史假節
錄前後勳封宜城伯咸康三年嶽遣軍伐夜郎破
之加督寧州進征虜將軍遷平南將軍卒子遐嗣
嶽弟逸字茂山亦有武幹嶽卒後以逸監交廣州
建威將軍平越中郎將廣州刺史假節

晉書本傳

溫放之嶠子少歷清官累至給事黃門侍郎以貧
求爲交州朝廷許之王述與會稽王駿曰放之溫
嶠之子宜見優異而授之嶺外竊用愕然願遠存

周禮近參人情則望實惟允時竟不納放之既至南海甚有威惠將征林邑交阯太守杜寶別駕阮朗並不從放之以其阻衆誅之勒兵而進遂破林邑而還卒於官

晉書溫傳

謝奉字宏道會稽山陰人祖端散騎常侍父鳳丞

相主簿奉歷安南將軍廣州刺史

世說新語注

爲政清

靜不煩召爲吏部尙書免官還東

謝安赴桓溫

司馬出西相遇破岡旣當遠別遂停三日共語安

欲慰其失官奉輒引以他端雖信宿中途竟不言及此事安深恨在心未盡謂同舟曰謝奉故是奇

世說新語

羅友字它仁襄陽人少好學性嗜酒當其所遇不擇士庶桓溫常責之友傲然不屑始仕荊州後在溫府以家貧乞祿溫雖以才學遇之而謂其誕肆非治民才許而不用後同府人有得郡者溫爲席送別友至尤晚問之友答曰中路逢一鬼大見擲掄云我只見汝送人作郡何以不見人送汝作郡民始怖終慚回還以解不覺成淹緩之罪溫雖笑其滑稽而心頗愧焉後以爲襄陽太守累遷廣益二州刺史在藩舉其宏綱不存小察甚爲吏民所安說薨於益州

世說新語注引晉陽秋

孔汪字德澤會稽山陰人好學有志行孝武帝時

位至侍中時茹千秋以佞媚見幸於會稽王道子汪屢言之於帝帝不納遷尙書太常卿以不合意求出爲假節都督交廣二州諸軍事征虜將軍平越中郎將廣州刺史甚有政績爲嶺表所稱太元十七年卒

晉書孔愉傳

吳隱之字處默濮陽鄆城人魏侍中質六世孫美姿容善談論博涉文史以儒雅標名弱冠而介立有清操雖日晏歡菽不饗非其粟擔石無儲不取非其道廣州包山帶海珍異所出一篋之寶可資數世然多瘴疫人情憚焉惟貧窶不能自立者求補長吏故前後刺史皆多贖貨朝廷欲革嶺南之弊隆安中以隱之爲龍驤將軍廣州刺史假節領平越中郎將未至州二十里地名石門有水曰食泉飲者懷無厭之欲隱之旣至語其親人曰不見可欲使心不亂越嶺喪清吾知之矣乃至泉所酌而飲之因賦詩曰古人云此水一畝懷千金試使夷齊飲終當不易心及在州清操踰厲常食不過菜及乾魚而已帷帳器服皆付外庫時人頗謂其矯然亦始終不易帳下人進魚每剔去骨存肉隱之覺其用意罰而黜焉及盧循寇南海隱之率厲將士固守彌時長子曠之戰沒循攻擊百有餘日踰城放火焚燒三千餘家死者萬餘人城遂陷隱

之攜家累出欲奔還都爲循所得循表奏朝廷以
 隱之黨附桓元宜加裁戮詔不許劉裕與循書令
 遣隱之還久方得反歸舟之日裝無餘貲其妻劉
 氏齋沉香一斤隱之見之遂投於湖亭之水義熙
 九年卒追贈光祿大夫加散騎常侍晉書本傳
 云晉龍驤將軍廣州刺史光祿大夫贈散騎常侍
 吳隱之隱之處過情羣雁來集博涉文史以儒雅稱
 母號稱賢明每謂其子汝居銓衡舉如此人乃獲
 階升坦之及禍請代其兄桓溫知之拜奉朝請廣
 州貢山包帶南溟富可富淹握致之拜奉朝請廣
 人憚其行乃擢刺史南越以平二十里所石門是
 經有泉一畝貪心乃生我獨酌飲屬妻齋沉香投
 改觀有詔褒旌賣犬嫁女蕭然無營妻齋沉香投
 之湖亭盧循之難不敗厥名卒於義熙而不永齡
 士以爲榮
 儲叔度河南陽翟人也爲高祖車騎參軍事盧循
 攻查浦叔度力戰有功循南走高祖版行廣州刺
 史仍除都督交廣二州諸軍事建威將軍領平越
 中郎將廣州刺史桓元族人開山聚衆謀掩廣州
 事覺叔度悉平之義熙八年盧循餘黨劉敬道窘
 迫詣交州歸降交州刺史杜慧度以事言統府叔
 度以敬道等路窮請命事非誠款報使誅之慧度
 不加防錄敬道招集亡命攻破九真殺太守杜章
 民慧度討平之叔度輒貶慧度號爲奮揚將軍惡
 不先上爲有司所糾詔原之高祖受命爲右衛將
 軍高祖以其名家而能竭盡心力甚嘉之乃下詔

曰夫賞不遺勤則勞臣增勸爵必疇庸故在功威
 達叔度南北征討常管戎要西夏不虔誠著嶺表
 可封番禺縣男食邑四百戶宋書本傳
 張茂度吳郡吳人張良後也名與高祖諱同故稱
 字祖彭祖廣州刺史茂度出補晉安太守盧循爲
 寇覆沒江州度及建安太守孫蚪之並受其符書
 供其調役循走俱坐免官復以爲始興相郡經賊
 寇廢宇焚燒民物彫散百不存一茂度初立城寺
 弔死撫傷收集離散民戶漸復高祖北伐出爲使
 持節督交廣二州諸軍事建武將軍平越中郎將
 廣州刺史綏靜百越嶺外安之宋書本傳
 杜瑗交趾朱載人以功爲龍驤將軍交州刺史義
 旗進號冠軍將軍盧循竊據廣州遣使通好瑗斬
 之慧度瑗第五子也初爲州主簿流民督護遷九
 真太守瑗卒府州網佐以交土接寇不宜曠職共
 推慧度行州府事辭不就七年除使持節督交州
 諸軍事廣武將軍交州刺史詔書未至其年春盧
 循襲破合浦徑向交州慧度乃率文武六千人拒
 循於石碕交戰禽循長史孫建之循雖敗餘黨猶
 有三千人皆習練兵士李子遜李奕李脫等奔竄
 石碕盤結俚僚各有部曲循知奕等與杜氏有怨
 遣使招之奕等引諸俚帥衆五六千人受循節度

六月庚子循晨造南津命三軍入城乃食慧度悉出宗族私財以充勸賞弟交趾太守慧期九真太守章民並督率水步軍慧度自登高艦合戰放火箭雉尾炬步軍夾兩岸射之循衆艦俱然一時散潰循中箭赴水死斬循及父煨并循二子親屬錄事參軍阮靜中兵參軍羅農夫李脫等傳首京邑封慧度龍編縣侯食邑千戶

宋書良吏傳

劉謙之彭城呂人好學撰晉紀二十卷義熙末爲始興相東海人徐道期流寓廣州無士行爲僞舊所凌侮因刺史謝欣死合率羣不逞之徒作亂攻沒州城殺士庶素憾者百餘傾府庫招集亡命出攻始興謙之破走之進平廣州誅其黨羽仍行州事卽以爲振威將軍廣州刺史

宋書劉康祖傳

王鎮之字伯重琅邪臨沂人徵士宏之兄也初爲瑯邪王衡軍行參軍出補剡上虞令並有能名內史謝翰請爲山陰令復有殊績以討徐道覆功封華容縣五等男徵廷尉晉穆帝何皇后山陵領將作大匠遷御史中丞秉正不撓百寮憚之出爲使持節都督交廣二州諸軍事建威將軍平越中郎將廣州刺史高祖謂人曰王鎮之少著清績必將繼美吳隱之嶺南之弊非此不康也在鎮不受俸祿蕭然無所營去官之日不異始至高祖踐阼鎮

之以脚患自陳出爲輔國將軍瑯邪太守永初三年卒於官時年六十六

宋書良吏傳

王誕字茂世琅邪臨沂人大保安從兄也祖恬中軍將軍父混太常誕少有才藻隆安四年會稽王世子元顯開後軍府乃以誕補功曹尋除尚書吏部郎仍爲後軍長史領廬江太守加鎮蠻護軍轉龍驤將軍琅邪內史長史如故誕結事元顯嬖人張法順故爲元顯所寵元顯納妾誕爲之親迎隨府轉驃騎長史將軍內史如故元顯討桓元欲悉誅桓氏誕固陳脩等與元志趣不同由此得免脩誕甥也及元得志誕將見誅脩爲之陳請又言脩等得免之由乃徙誕廣州盧循據廣州以誕爲其平南府長史甚賓禮之誕久客思歸乃說循曰下官流遠在此被蒙殊眷士咸知己實思報答本非戎旅在此無用素爲劉鎮軍所識情味不淺若得北歸必蒙任寄公私際會思報厚恩愈於停此空移歲月循甚然之時廣州刺史吳隱之亦爲循所拘畱誕又曰將軍今畱吳公公私非計孫伯符豈不欲畱華子魚但以一境不容二君耳於是誕及隱之並得還除員外散騎常侍未拜高祖請爲太尉諮議參軍轉長史盡心歸奉日夜不懈高祖甚委仗之

宋書良吏傳

張鎮字義遠吳人忠恕竟明簡正貞粹奉安
中除蒼梧太守討王含有功封興道縣侯劉義慶世說新語

尹虞長沙人也任始興太守起兵討杜弢戰敗二

女爲弢所獲並有國色弢將妻之女曰我父二千

石終不能爲賊婦有死而已弢並害之晉書列女傳

楊方字公同少好學有異才初爲郡鈴下威儀公

事之暇輒讀五經鄉邑未之知內史諸葛恢見而

奇之待以門人之禮由是始得周旋貴人間時虞

喜兄弟以儒學立名雅愛方爲之延譽恢嘗遣方

爲文薦郡功曹主簿虞預稱美之送以示賀循循

遂稱方於京師司徒王導辟爲掾轉東安太守遷

司徒參軍方在都邑搢紳之士咸厚遇之自以地

寒不願久留京華求補遠郡欲閑居著述導從之

上補高梁太守在郡積年著五經鈎沉更撰吳越

春秋並雜文筆皆行於世以年老棄郡歸導將進

之臺閣固辭還鄉里終於家晉書本傳

鄧騫字長真長沙人有節操忠信兼識量宏遠善

與人交久而益敬太尉庾亮稱之以爲長者歷武

陵始興太守遷大司農卒於官晉書本傳

袁宏字彥伯侍中猷之孫也父勗臨汝令宏有逸

才文章絕美謝尚鎮牛渚引宏參其軍事累遷大

司馬桓溫府記室性彊正亮直雖被溫禮遇至於
辯論每不阿屈故榮任不至晉書文苑傳哀帝時爲南

海太守表章行誼大興風教漢徵士番禺董正學

行著在南土宏奏旌其門黃志

胡藩字道序豫章南昌人也高祖遷彭城參相國

軍事時盧循餘黨與蘇淫賊大相聚結以爲始興

相論平司馬休之及廣固功封陽山縣男食邑五

百戶少帝景平元年坐守東府開掖門免官尋復

其職十年卒時年六十二諡曰壯侯子隆世嗣宋書本傳

宋

陸徽字休猷吳郡人元嘉十四年爲始興太守明

年仍除使持節交廣二州諸軍事綏遠將軍平越

中郎將廣州刺史清名亞王鎮之爲士民所愛詠

上表薦士曰臣聞陵雪褒賴貞柯必振尊風賞流

清原斯挹是以衣囊揮舉於西京折轅延高於東

帝伏見廣州別駕從事史朱萬嗣年五十三字少

豫理業冲夷操秉純白行稱私庭能著官政雖氏

非世祿宦無通資而隨牒南服位極僚首九絳州

綱三端府職頻掌蕃機屢績符守年暨知命廉尚

愈高冰心與貪流爭激霜情與晚節彌茂歷宰金

山家無寶鏤之飾連組珠海室靡瑋珥之珍確然

守志不求聞達實足以澄革汙吏洗鏡貪氓臣謬忝司牧任專萬里雖情祇愼擢才闕豪露敢罄愚陋舉其所知如得提名禮闈抗迹朝省搏嶺表之清風負冰宇之潔望則恩融一臣而施光萬物敢緣天澤雲行時德雨施每甄外州榮加遠國是以獻其瞽言希垂聽覽二十一年徵以爲南平王鑠冠軍司馬長沙內史行湘州府事

宋書良吏傳

劉劭字伯猷彭城人也祖懷義始興太守父穎之汝南新蔡二郡太守征林邑遇疾卒劭少有志節兼好文義家貧爲廣州增城令廣州刺史劉道錫引爲揚烈府主簿元嘉二十七年索虜南侵道錫遣劭奉使詣京都太祖引見之酬對稱旨除寧遠將軍綏遠太守元嘉末蕭簡據廣州爲亂劭起義討之燒其南門廣州刺史宗慤又命爲軍府主簿以功封大亭侯除員外散騎侍郎孝建初荆江反叛宗慤以劭行寧朔將軍湘東內史領軍出安陸會事平以本號爲晉康太守又徙鬱林太守大明初還都徐州刺史劉道隆請爲寧朔司馬竟陵王誕據廣陵爲逆劭隨道隆受沈慶之節度事平封金城縣五等侯除西陽王子尚撫軍入直閣先是遣費沈伐陳檀不克乃除劭龍驤將軍西江督護鬱林太守劭既至率軍進討隨宜翦定大致名馬

并獻珊瑚連理樹上甚悅還除新安王子鸞撫軍中兵參將遭母憂不拜前廢帝卽位起爲振威將軍屯騎校尉入直閣太宗卽位加寧朔將軍校尉如故江州刺史晉安王子勛爲逆四方響應劭以本官領建平王景素輔國司馬進據梁山會豫州刺史殷悅反叛徵劭還都假輔國將軍率衆討悅復除使持節督廣交二州諸軍事平越中郎將廣州刺史將軍如故不拜及悅開門請降勅約令三軍不得妄動城內士民秋毫無所失百姓咸悅成曰來蘇生爲立碑改督益寧二州諸軍事益州刺史持節將軍如故又不拜還京都拜太子左衛率封鄱陽縣侯食邑千戶子悅嗣順帝昇明末爲廣州刺史齊受禪國除

宋書本傳

宗慤字元幹南陽人也叔父炳高尙不仕慤年少時炳問其志慤曰願乘長風破萬里浪炳曰汝不富貴卽破我家矣元嘉二十二年伐林邑慤自奮請行義恭舉慤有膽勇乃除震武將軍爲安西參軍蕭景憲軍副隨交州刺史檀和之圍區粟城林邑遣將范毗沙達來救區粟和之遣偏軍拒之爲賊所敗又遣慤慤乃分軍爲數道偃旗潛進討破之拔區粟入象浦林邑王范陽邁傾國來拒以具裝被象前後無隙士卒不能當慤曰吾聞師子威

服百獸乃製其形與象相禦象果驚奔衆因潰散遂克林邑收其異寶雜物不可勝計慙一無所取衣櫛蕭然文帝甚嘉之宋書本傳三十年七月以右衛將軍爲廣州刺史宋書孝武紀

王琨瑯琊臨沂人轉吏部郎吏曹選局出爲持節都督廣交二州軍事建威將軍平越將軍平越中郎將廣州刺史南土沃實在任者常致巨富世云廣州刺史但經城門一過便得三千萬也琨無所取納表獻祥休之半州鎮舊有鼓吹又啟輸還及罷任孝武知其清問還資多少琨曰臣買宅百三十萬餘物稱之帝悅其對齊書本傳

羊希字泰開少有才氣大明初爲尚書左丞大明末爲始安王子真征虜司馬黃門郎御史中丞泰始三年出爲寧朔將軍廣州刺史希初請女夫鎮北中兵參軍蕭惠微爲長史帶南海太守太宗不許又請爲東莞太守希既到鎮長史南海太守陸法真喪官希又請惠微補任詔曰希卑門寒士累世無聞輕薄多置備彰慝職徒以清刻一介擢授嶺南千上逞欲求訴不已可降號橫野將軍初李萬周劉嗣祖藉畧廣州事在鄧琬傳太宗以萬周爲步兵校尉加寧朔將軍權行廣州事希既至而萬周等並有異圖希誅之希以沛郡劉思道行晉

康太守領軍伐俚思道違節度失利希遣收之思道不受命率所領攻州希遣平越長史鄒投於朝亭拒戰軍敗見殺思道進攻州城司馬鄒嗣之拒之西門戰敗又死希踰城走思道獲而殺之府參軍鄒曼率數十人襲思道既得入城力不敵又敗東莞太守蕭惠微率郡文武千餘人攻思道戰敗又見殺時龍驤將軍陳伯紹率軍伐俚還擊思道定之贈希輔國將軍惠微中書郎嗣之越騎校尉希子崇字伯遠尚書主客郎丁母憂哀毀過禮及聞廣州亂卽日便徒跣出新亭不能步涉頓伏江渚門義以小船致之於是進路父葬畢不勝哀卒宋書羊元保傳

陳伯紹潁川人廣州西南有二江川源深遠別置都護專征討之以伯紹爲西江都護宋書伯紹傳泰始四年三月交州人李長仁據州叛妖賊攻廣州殺刺史羊南伯紹時爲龍驤將軍討平之宋書明合帝紀浦北界夷獠叢居隱伏巖隙寇盜不賓畧無編戶伯紹獵北地見二青牛驚走入草使人逐之不得乃誌其處云此地當有奇祥啟立爲越州七年始置百梁隴蘇永安安昌富昌南流六郡割廣交朱載三郡屬元微二年以伯紹爲刺史始立州鎮穿山爲城門威服俚獠土有瘴氣殺人漢世交州刺

史每暑月輒避處高今交土調和越瘴獨甚刺史常事戎馬唯以戰伐爲務

南齊書州郡志

陳顯達南彭城人也宋孝武世爲張永前軍幢主泰始四年封彭澤縣子邑三百戶歷馬頭義陽二郡太守羽林監濮陽太守隸太祖討桂陽賊於新亭壘劉劭大桁敗賊進杜姥宅及休範死太祖欲還衛宮城或諫太祖曰桂陽雖死賊黨猶熾人情難固不可輕動太祖乃止遣顯達率司空參軍高敬祖自查浦渡淮緣石頭北道入承明門屯東堂宮中恐動得顯達至乃稍定顯達出杜姥宅大戰破賊矢中左眼拔箭而鏃不出地黃村潘姬善禁先以釘釘柱姬再步作氣釘卽時出乃禁顯達目中鏃出之封豐城縣侯邑千戶轉遊擊將軍尋爲使持節督廣交越三州湘州之廣興軍事輔國將軍平越中郎將廣州刺史進號冠軍沈攸之事起顯達遣軍援臺長史到遁司馬諸葛導謂顯達曰沈攸之擁衆百萬勝負之勢未可知不如保境蓄衆分遣信驛密通彼此顯達於座手斬之遣表疏歸心太祖進使持節左將軍軍至巴邱而沈攸之平除散騎常侍左衛將軍轉前將軍太祖太尉左司馬

南齊書本傳

孫曇瑱吳郡人少讀書知大義明兵法果幹有氣

力泰始中會稽吳郡不服明帝篡位太守顧琰用曇瑱爲偏裨後歸朝爲屯騎校尉每運矛超距軍士率服元徽五年夏五月遷越州刺史俾選越騎入衛合浦吏民聞其將畧莫不聽命尋進加輔國將軍蕭道成立順帝將行篡逆是年冬十一月司徒袁粲謀欲討之以員外散騎侍郎胡羨生行越州事徵曇瑱至建康粲與尚書令劉秉等遂起兵據石頭曇瑱帥越騎密相響應已而粲使蘇烈據倉城道成遣其帳內軍主戴僧靜將腹心先至石頭射書與烈夜絕入城粲登城西南門烈燭火處分臺軍至射之火乃滅回登東門曇瑱驍勇善戰每盪一合輒大殺傷臺軍死者百餘人軍主王天生殊死拒戰故得相持自亥至丑有流星赤色照地墜城中僧靜率力攻倉門身先士卒衆潰僧靜手斬粲於是外軍燒門入曇瑱獨與廣人龍蘇數騎脫走歸吳明年冬十月己卯被道成捕得見殺初曇瑱之亡命也范法詢妻褚氏謂其子僧簡曰孫越州先姑之姊子與汝父親則從母兄弟交則義重古人逃竄脫不免汝宜收之曇瑱尋伏法褚氏令僧簡往斂葬

黃志

謝昌寓陳郡人也爲劉俊廣州參軍孝性甚至嘗養一鵠昌寓病二旬而鵠二旬不食昌寓亡而鵠

遂飛去

南史孝
義傳

徐豁字萬同東莞姑幕人也精練明理爲一世所推元嘉初爲始興太守三年遣大使巡行四方并使郡縣各言損益豁因此表陳三事其一曰郡大田武吏年滿十六便課米六十斛十五以下至十三皆課米三十斛一戶內隨丁多少悉皆輸米且十三歲兒未堪田作或是單迴無相兼通年及應輸便自逃逸既過接轡俚去就益易或乃斷截支體產子不養戶口歲減實此之由謂宜便量課限使得存立今若減其米課雖有交損考之將來理有深益其二曰郡領銀民三百餘戶鑿坑採砂皆二三丈功役既苦不顧崩壓一歲之中每有死者官司檢切猶致違老少相隨永絕農業千有餘口皆資他食豈惟一夫不耕或受其飢而已所以歲有不稔便致甚困尋臺郎用米不異於銀謂宜准銀課米卽事爲便其三曰中宿縣俚民課銀一子丁輸南稱半兩尋此縣自不出銀又俚民皆巢居鳥語不閑貿易之宜每至買銀爲損已甚又稱兩受入易生姦巧山俚愚怯不辨自申官所課甚輕民以所輸爲劇今若聽計丁課米公私兼利在郡著績太祖嘉之下詔曰始興太守豁潔己退食恪居在官政事修理惠澤沾被近嶺南荒弊郡境

尤甚拯卹有方濟厥饑饉雖古之良守蔑以尙焉宜蒙褒賁以旌清績可賜絹二百匹穀千斛五年以爲持節督廣交二州諸軍事寧遠將軍平越中郎將廣州刺史未拜卒時年五十一太祖又下詔曰豁廉清勤恪著稱所司故擢授南服申其才志不幸喪殞朕甚悼之可賜錢十萬布百匹以營葬

宋書良
吏傳

檀和之高平金鄉人父憑積有軍功和之智勇尤著文帝嘗稱其有將才元嘉十六年爲始興內史在郡課耕桑靖獄市吏治明果境內肅然士民敬之會交州立宋隆郡工役未竣二十年冬十二月庚午詔以和之爲交州刺史蒞交畱意足民民忘工築之勞乃更練武會林邑王陽邁貢獻陋薄而寇盜不已文帝忿其違傲二十三年以和之爲龍驤將軍領交廣兵及振武將軍宗慤伐之和之遣司馬蕭景憲爲前鋒陽邁聞之懼欲輸金一萬斤銀十萬斤銅三十萬斤還所畧曰南戶其大臣薨僧達諫止之乃遣大帥范扶龍戍其北界區粟城景憲攻城克之乘勝入象浦陽邁以具裝被象來拒慤製師子形禦之象果驚奔遂克林邑陽邁父子並挺身逃奔獲其珍異皆是未名之寶又銷其金人得黃金數十萬斤和之既克遠夷益自謙慎

以餘財頒及交廣軍士捷聞召還以功封雲杜縣子景憲代刺交州二十四年冬十月和之南還至豫章值豫章民胡誕世反殺太守檀隆之和之討誕世平之孝建三年爲南兖州刺史坐事免官病卒追贈左將軍諡曰襄子

黃志

鄧琬字元琬豫章南昌人也世祖起義版琬爲輔國將軍南海太守率軍伐蕭簡於廣州攻圍踰年乃克以臧質反爲江州刺史宗慤所執值赦原琬弟璩與臧質同逆質敗從誅琬弟環亦坐誅琬在遠又有功免死遠徙仍停廣州久之得還大明七年擢爲給事黃門侍郎明年出爲晉安王子勛鎮軍長史尋陽內史行江州事前廢帝狂悖無道因何邁之謀乃遣使齎藥賜子勛死琬曰身南土寒士蒙先帝殊恩以愛子見託豈得惜門戶百口其當以死報効廢昏立明景和元年十一月十九日稱子勛敎卽日戒嚴會太宗定亂進子勛號車騎將軍開府儀同三司令書至琬與陶亮等繕治器甲徵兵四方傳檄京師購太宗萬戶侯布絹二萬疋金銀五百斤羣僚上僞號於子勛泰始二年正月七日卽位於尋陽改景和二年爲義嘉元年始安內史王職之建安內史趙遁生安成太守劉襲並舉郡奉順琬遣龍驤將軍廖校率數千人并發

廬陵白丁攻襲襲與郡丞檀玢拒戰大敗玢臨陳見殺襲棄郡走據險自守拔虜掠而退襲復出據郡時齊王率衆東北征討而齊王世子爲南康顧令琬遣使收世子世子腹心蕭欣祖桓康等數十人奉世子長子奔竄草澤召募得百餘人攻郡出世子世子自號寧朔將軍與南康相沈用之前南海太守何曇直晉康太守劉紹祖北地傅浩東莞童禽等據郡起義琬徵始興相殷孚爲御史中丞并令率郡人俱下孚衆盛世子避之於揭陽山琬遣武昌戴凱之爲南康相世子率衆攻之凱之戰敗遁走世子遣幢主檀文起千人戍武昌與襲相應琬又遣廖校與其中兵參軍胡昭等築壘於武昌堅壁相守琬召豫章太守劉衍以爲右將軍中護軍殷孚代爲豫章太守督上流五郡以防襲等殷孚旣去始興以郡五官掾譚伯初留知郡事土人劉嗣祖等新伯初據郡起義琬遣始興太守韋希真應揚將軍楊宏之領衆一千討嗣祖嗣祖亦遣衆出南康與齊王世子合希真等以義徒彊盛住廬陵不敢進廣州刺史袁曇遠聞始興起義遣將李萬周陳伯紹率衆討嗣祖嗣祖遣兵戍漬陽萬周亦築壘相守嗣祖遣人誑萬周曰尋陽已平臺遣劉劭爲廣州垂至萬周信之便回還襲番禺

夜以長梯入城疊遠怯弱無防聞萬周反便徒跣
出奔萬周追斬之於城內交州刺史檀翼被代還
至廣州資貨鉅萬萬周誣以爲逆襲而殺之遂劫
掠公私銀帛藉畧袁檀珍寶悉以自入

宋書本傳

沈法系字體先吳興武康人也有將用世祖伐逆
以爲南中郎參軍加寧朔將軍領三千人前發事
平以爲寧朔將軍始興太守討蕭簡於廣州聞臺
軍將至簡誑其衆曰臺軍是賊劬所遣並信之前
征北將軍顧邁被賊徙在城內善天文云荆江有
大兵城內由此固守初世祖先遣鄧琬圍簡唯治
一攻道法系至曰宜四面並攻若守一道何時可
拔琬慮功不在己不從法系曰更相守五十日曰
盡又不克乃從之八道俱攻一日卽拔斬蕭簡廣
州平封庫藏付鄧琬而還官至驍騎將軍尋陽太
守

宋書沈慶之傳

陸法真吳郡人歷官有清節嘗爲劉秀之安北錄
事參軍太山羊希與安北咨議參軍孫詵書曰足
下同僚似有陸錄事者此生東南名地又張元外
孫持身至清雅有志節年高官下秉操不衰計當
日夕相與申意太宗初爲南海太守卒官

宋書良吏傳

孫奉伯始興太守太始五年明帝訪太子妃而雅
信小數名家女多不合江氏以下筮吉故爲太子

納之六年拜皇太子妃諷朝士州郡皆令獻物多
者將直百金奉伯止獻琴書其外無餘物上大怒
封藥賜死既而原之

南史江皇后傳

伏曼容字公儀平昌安邱人早孤與母兄客居南
海少篤學聚徒教授以自業爲驛騎行參軍昇明
末爲輔國長史南海太守至石門作貪泉銘天監
元年卒

南史儒林傳

庾道愍潁川陽陵人晉司空冰之元孫也有孝行
頗能屬文少出孤梓時人莫知其所生母流漂交
州道愍尙在襁褓及長知之求爲廣州綏寧府佐
至南而去交州尙遠乃自負擔冒險僅得自達及
至交州尋求母雖經年日夜悲泣嘗入村日暮雨
驟乃寄止一家旦有一嫗負薪外還而道愍心動
因訪之乃其母也於是行伏號泣遠近赴之莫不
揮淚

南史孝義傳

廣東通志卷二百三十二終

廣東通志二百三十三

宦績錄三 南齊 梁 陳 隋

范雲 陶季直 俱郡屬官 以上南齊

樂鵠 柳惲 弟勃

蕭恭 蕭勵 弟勃

蘭欽 胡頴

孫瑒 歐陽頎

杜僧明 徐虔

杜稜 俱州屬官 王僧孺

何遠 王勣

蕭介 劉覽 俱郡屬官

周文育 錢道戡

蔡景歷 周鉄虎 俱縣令 以上梁

沈君高 沈恪

馬靖 王猛

陳方慶 俱州屬官 周法尚

章洸 慕容三藏

裴矩 令狐熙

樊子益 侯莫陳穎

柳旦 劉澄

鄧文進 俱州屬官 以上南齊

南齊

范雲字彥龍南鄉舞陰人晉平北將軍江六世孫

也出爲零陵內史在任潔已省煩苛去游費百姓

安之明帝召還都及至拜散騎侍郎復出爲始興

內史郡多豪猾大姓二千石有不善者謀共殺害

不則逐去之邊帶蠻俚尤多盜賊前內史皆以兵

刃自衛雲入境撫以恩德罷亭侯商賈露宿郡中

稱爲神明仍遷假節武建將軍平越中郎將廣州

刺史初雲與尚書僕射江革善詔姨弟徐藝爲曲

江令深以託雲有譚儼者縣之豪族藝輒之儼以

爲耻詣京訴雲雲坐儼下獄會赦免 梁書 本傳

陶季直丹陽秣陵人也祖愍祖宋廣州刺史父景

仁中散大夫季直早慧愍祖甚愛異之遷太尉記

室參軍出爲冠軍司馬東莞太守在郡號爲清和

梁書 本傳

樂鵠字蔚遠南陽滎陽人晉尚書令廣之六世孫

天監初遷驍騎將軍領少府卿俄遷御史中丞領

本州大中正二年出爲持節督廣交越三州諸軍

冠軍將軍平越中郎將廣州刺史前刺史徐元瑜

罷歸道遇始興人士反逐內史崔睦舒因掠元瑜

財產元瑜走歸廣州借兵於鵠託欲討賊而實謀

襲鵠鵠覺之誅元瑜尋進號征虜將軍卒官 梁書 本傳